

ዔርሚያሴኮ ቃዮ ማፃአፖ ዓይያ ካር

ዔርሚያሴኮ ቃዮ ማፃአፖ፡- ኪሪሰቶሴ ሾይንታንዳሢኮ ቤርታ ደንጎ ጄኤታና ሳሊታሚ ላሆ ማዓ ሌዖይዳ ዩሩሳላሜ ካታማ ሻሂንቲሢሮ፤ ጊንሣ ሃሣ ዓኢካ ናንጋ ዴራኦ ዳውሲንቲ ዴንዴሢሮ ዖዪ ካላሎና ደንጎ ካላሊ ዓርቄያኬ። ሃኖ ማፃአፖይዳ ዓኣ ባካ ባሼ ዩኤፐ ዛላና ሲዩ ዛላ ከኤዛያ ማዔቴያ ዖኦሲዳ ጉሙርቂሢ ጌሥሢ ዛላንታ ሃጋኦ ማዓንዳ ዎዛ ጌሢ ናንጊሢ ዛላኦ ከኤዛ ቤሲ ዓኣኔ፤ ዩያቶ ካላሎ ኪሪሰቶሴ ሾይንታንዳሢኮ ቤርታ ደንጎ ጄኤታና ሳሊታሚ ላሃሳ ሌዖና ዓጩሎይዳ ሄሌ ባይሲንቶ ማሊ ጶቂሢኒ ዓይሁዶ ዓሳ ሙኡዚ ሃሺሢና ዖዪሢ ካኦሺ ሌዓ ሌዓ ካኦሽካ ዎዶና ዩያቶ ካላሎ ናባባኔ።

ማፃአፔላ ዲማ ዲማ ዓርቄ ባኮ

- ቤርታሳ ቃዮ፡- ዩሩሳላሜ ሜታጴ ሜቶንታ ዖዪንቲ ዖዪያ (1:1-22)
- ላማሳ ቃዮ፡- ዖኦሲ ዩሩሳላሜይዳ ዓጌ ዴኤያ ሜቶ (2:1-22)
- ሃይሣሳ ቃዮ፡- ሃጊ ማዓንዳ ዎዛ ባኦዚ ዓኣያ ማዒያ (3:1-66)
- ዖይዳሳ ቃዮ፡- ዩሩሳላሜኮ ባይሲንቶ (4:1-22)
- ደንጋሳ ቃዮ፡- ማኦሪሢ ዴንቃኒ ሺኢቂንታ ሺኢጲሢ (5:1-22)

ዩሩሳላሜ ካታሞኮ ሜቶንታ ዖዪያንታ

- 1 ሃያኮ ቤርታ ዓሲ ኩሚ ዓኣ ካታሚላ
 - ሃሢ ዎዎይቲያ ሃሺንቲ ቤሲ ማዒ ዓቴንቲሞ!
 - ዓጩ ባኦኮይዳ ዴኤፐ ማዒ ዓኣዛ
 - ዓኒ ሃይቄ ላኦሊጉዲ ማዔንቲሞ!
 - ዲማ ዲማ ፓቂንቲ ዓጩፓ ጌኤሾ ማዒ ዓኣዛ
 - ሃሢ ዓይሌ ማዒ ዴዔኔ።

- 2 ዒዛ ዲሞና ዒናፓ ዩኤካኔ፤
 - ዓሲፃ ዒዛኮ ጋጋጮና ሊካ ከዳኔ፤
 - ዒዛ ሃያኮ ቤርታ ናሽካ ዓሶ ቢያሢዳፓ
 - ዒዛ ደዲሻ ዓሲ ፔቲታዖ ባኦሴ፤
 - ዒዛኮ ላጎ ማዔ ዓሳ ቢያ ዒዛ ሃሹኔ፤
 - ሞርኬ ማዒያኦ ዒዛይዳ ዔቄኔ።

- 3 ዪሁዳ ዴራ ሚርጌ ዋኣዪንቲ ዓይላቶ ማደዋ ማዴሰካፓ
 ዲዒንቲ ዔውቲኔ፤
 ሃሢ ዔያታ ማሌ ዴሮ ባኣካ ናንጋኣና
 ፔቲታዎ ዔያቶኮ ሃውሾ ባኣሴ፤
 ዔያታ ሚርጌና ካራ ባይዚ ዓኣንቲ
 ዔያቶ ዳውሳ ዓሳ ሙኪ ሄሌኔ።
- 4 ዎኣኒያ ዒኢካ ቦንቺንታ ቦንቾ ቦንቻኒ ሙኪንዲዋኣሢሮ
 ጂዮኔ ዴኮ ባንሢ ዴንዶ ጎይፃ ቦቦይታሳያ ዔዌ ማዓንዳኔ፤
 ዬሩሳላሜ ጌሎ ካሮና ጌላ ዓሲንታ ኬሰካ ዓሲያ ባኣሴ፤
 ዒኢካ ዓኣ ቄኤሳ ማታዲ ፔ ዒኖና ዚኢሊንታኔ፤
 ዉዴሮ ናኣታኣ ዎዪ ማታዲኔ፤
 ጂዮኔ ካራ ባይዚ ማታዲሢዳኩ።
- 5 ዒዛ ሚርጌ ጎሜ ማዴሢሮ
 ናንጌና ናንጋ ጎዳ ዒዛ ማቶይዳ ዓጌኔ፤
 ዒዛኮ ናኣቶ ሞርካ ዲዒ ዔኪ ዴንዴኔ፤
 ዒዛኮ ሞርካ ዒዛ ዎይሣያ ማዔሢሮ
 ሞርኮም ዔኤቢ ጌኢጌኔ።
- 6 ዬሩሳላሜኮ ቦንቺንታ ቢያ ባይቂ ጋፔኔ፤
 ዒዛ ዎይሢ ሱኡጋ ሄንቆ ቤሲ ባይዜ ሞይሌ ማዔኔ፤
 ዔያቶ ኬማ ዓሳ ዳውሳዛ
 ዎልቃ ዔያቶኮ ጋፒ ላባንዲያ ሄላንዳኣና ዔያታ ጳሽኪ ፑኔኔ።
- 7 ዬሩሳላሜ ዴራ ካራ ባይዚ ማታዲ ዋኣዪንታ ዎዶና
 ሃያኮ ቤርታ ዔያቶኮ ዓኣ ባኮ ማሊ ጳቂሣንዳኔ፤
 ዔያታ ሞርኮ ኩጮ ጋሮ ጌላዛ
 ዔያቶ ማኣዳ ዓሲ ባኣያ ማዓዛ
 ሞርካ ዔያቶኮ ካታሞ ዶዒዎ ዛጋዎ ሚኢጩኔ።
- 8 ዬሩሳላሜ ዴኤፒ ጎሜ ማዴኔ፤
 ዬያሮ ዒዛ ዒኢቲያ ማዔኔ፤
 ዒዛ ዑዎ ካላዲ ዓኣንቲ ዔያታ ዛጌሢሮ
 ቦንቻ ዓሳ ቢያ ቦሃ ዒዛ ቶኣቻኔ፤
 ዓኣፖ ካሮዋ ዔያቶ ቤርታፓ ዚኢሊንቲ ዒዛ ሺርሼኔ።
- 9 ሻቲማ* ዒዛኮ ማኣዓሢዳ ጴዴኔ፤
 ሃጋ ዒዛ ዓይጌ ሄላንዳቲያ ዒዛ ማሊባኣሴ፤
 ዒዛኮ ሎኦሚፃ ዓሲኮ ዑሰካ ጌላያኩ፤

* 1:9 1:9 ሻቲማ:- ዬኖ ጌይንቲሢ ዬሩሳላሜኮ ጎሞ ዔርዛ ማላታ ማሂኩ።

- ዒዛ ዶዲሻ ዓሲያእ ፔቴታዎ ባኣሴ፤
 ሞርካ ዒዛ ባሼሢሮ
 ዬያ ማቶ ዒዛኮ ዛጋንዳጉዲ ናንጊና ናንጋ ጎዳ ዒዛ ሺኢቄ።።
- 10 ዬሩሳላሜ ዳርኮ ዴኤፒ ቦንቸንታያ ማዔ ቆሎ ሞርካ ጌሊ ቡሬኔ፤
 ናንጊና ናንጋ ጎዳ ዳር ባኣኮ ጌሎዋጉዲ ላኣጊንቴ
 ማሌ ዓሳታዎ ዓቱዋዎ
 ጌኤዠ ማእሮ ጌላንቴ ዒዛ ዴንቄ።።
- 11 ዴራ ዒዛኮ ሙዖንዶ ባኣዚ ባይዚ ዒላቲዳኬ፤
 ዔያታ ሃይቁዋዎ ሸምፔና ናንጋኒ
 ጌኤኮ ዓኣ ቆሎ ቢያ ሙኡዚና ያኣካ፤
 ዬሩሳላሜ ዴራ «ናንጊና ናንጋ ጎዳሢዮ! ኑም ማሌ!
 ኑኡኮ ዳውሲንቶ ቢያ ዛጌ!» ጌይ ዒላታ።።
- 12 ናንጊና ናንጋ ጎዳ ጌኤኮ ዴኤፖ ዳጎ ኑጊዳ ጮኣሸኬ ኬሎና
 ኑና ሄሌ ማቶጉዴያ
 ማታ ሄሌ ዓሲ ዓኣቶ
 ሃንዳ ዒንሢ
 ጎይዖና ሴካ ሃንጋ ሃንታ ዓሳ ዛጉዋቴ!
 ዬይ ባካ ዒንሢሞ ሸሌዔ ባኣዚ ማላ?
- 13 «ሎኦፓ ታሚ ዒዚ ኬይሴኔ፤
 ዬይ ታማ ሚቸ ማጌዖ ጋሮ ኑኡኮ ዴንዴ፤
 ቶኮም ኑኡኮ ቡኡዶ ፒሮ ፒሬ፤
 ጊንሢሞ ኑና ጎቺ ማሄ፤
 ዒኖ ኑኡኮ ባይዚ ፔቴ ኬሊ ጉቤ ዑዖ ኑኡኮ ዶጪሴ።።»
- 14 «ዳቢንታ ታኣኮ ዎሊ ዑፃ ዳዒንቲ
 ባቃኖይዳ ቃንባራጉዲ ጌሢንቴ፤፤
 ዬይ ሚርጌ ዴኤፃያ ማዔሢሮ ዎልቄ ኑኡኮ ባይዘ፤፤
 ኑኡኒ ቃዛኒ ዳንዳዑዋ ኑኡኮ ሞርኮም ዒዚ ኑና ዔኪ
 ዒንጌ።።»
- 15 «ኑና ካፓ ፖኦሊሶ ናንጊና ናንጋ ጎዳ ዒዳ፣ ዔኪ ሺኢሸ፤፤
 ኑኡኮ ዴጌሢኮ ዎልቆ ጋኣጫኒ ያልዚ ዓሲ ኑጊዳ ዳኬ፤፤
 ያኦኒያ ጫርቄ ጌሊ ቤቁባኣ ካታሞይዳ ናንጋ ኑኡኮ ዳር
 ዎይኖ ጩኡጶ ቤዛ ሄርቁንታ ዎይኑጉዲ ሄርቄ ዒዚ ዳኣጻ።።»
- 16 «ሞርካ ኑና ባሼሢሮ ናኣቶም ኑኡኮ ካራ ባይቄ፤፤
 ኑና ዶዲሻ ዓሲ ባይቄሢሮ

ዓቢሢ ላኣሊ ላኣሊ ኑኡኒ ዩኤካኔ።»

17 «ዪዮኔ ኩጮ ፔኤኮ ሌካ ዔቁሴኔ፤
ጋዓንቴ ዒዞ ማኣዳ ዓሲያኣ ባኣሴ፤
ዓሺኖ ማዔ ዓጮይዳ ዓኣ ዓሳ ቢያ ያይቆኦቤ ዜርዖኮ
ሞርኬ ማዓንዳጉዲ ናንገና ናንጋ ጎዳ ዓይሤኔ፤
ዩሩሳላሜ ዔያቶ ባኣካ ዒኢቴ ባኣዚ ማዔኔ።»

18 «ዒዚ ዓይሤ ባኮ ዔያታ ዋይዞ ዒፃሢሮ
ዒ ማፎ ባኮና ናንገና ናንጋ ጎዳ ዳቢንቴባኣሴ፤
ዒንሢ ጴራ ቢያ ዋይዞ፣ ማቶዋ ታኣኮ ዛጉዋቴ፤
ጴጌ ማዔ ዓቴንቆንታ ዉዲራሢንታ ታኣኮ ዲዒንቴ ዔውቴኔ።»

19 «ታኣኮ ላጎ ታኣኒ ዔኤሌኔ፤
ዔያታ ጋዓንቴ ታና ዒፃኔ።
ቄኤሶንታ ሱኡጎንታ ቢያ ፔኤኮ ሹምፓሢ ዓውሳኒ
ሙዖ ኮይይይዳ ዓኣዖ ዒኢካ ካታሞ ሳዛ ጎይይይዳ ሃይቄኔ።»

20 «ናንገና ናንጋ ጎዳሢዮ!
ታኣኒ ካራ ባይቁ ሜታዲ ዋኣዪሢዳ ዓኣሢ ኔ ዛጉዋዳ?
ታኣኒ ኔኤም ዋይዞ ዒፃሢሮ ጎጳ ታኣኮ ዋኣፃኔ፣ ዒናኣ ታኣኮ
ዖዩኔ፤
ካታሞ ሳዛ ዓኣ ጎይይይዳ ማዖም ኬኤይይዳ ጴራ ታኣኮ ሃይቄ
ኩዳኔ።»

21 «ታኣኒ ሜታዲ ዩኤካ ዩኤፖ ዓሳ ዋይዜኔ፤
ጋዓንቴ ታና ደዲሻ ዓሲ ፔቴታዖ ባኣሴ፤
ታኣኒ ካራ ባይዚ ዋኣዪንታሢ ሞርካ ቢያ ዋይዜኔ፤
ኔ ማፎ ባኮ ዛሎና ዔያታ ዋዛፎኔ፤
ሃዳራ ኔኤኒ ጌዔ ኬሌላ ዩዖንጎ፤
ዔያቶይዳኣ ታና ሄሌ ባኮጉዴያ ሄሎንጎ።»

22 «ዔያቶኮ ፑርቶ ማፎ ቢያ ዛጌ፤
ታኣኮ ዳቢንቶ ቢያሢሮ ኔኤኒ ታጊዳ ሄሊሴ
ፑርቶ ባኮጉዴያ ዔያቶይዳኣ ሄሊሴ፤
ታኣኮ ሜቶ ዩኤፓ ዲቤኔ፣ ዒናኣ ታኣኮ ላቤኔ።»

2

ናንጊና ናንጋ ጎዳ ዩሩሳሌሜይዳ ዓጌ ሜቶ

- 1 ናንጊና ናንጋ ጎዳ ፔ ዳጎና ጊዮኔ ዳውሲሴኔ፤
 ጫሪንጮ ለካ ከሰኪ ዳጊ ጌይ ዴዔዞ
 ዒሰራዔኤሌኮ ሄርሺንቶዞ ዒዚ ሳዓ ጎቹ ዔኪ ከኤሬኔ፤
 ዒዚ ዳጋዴ ዓቦና ዒዛኮ ቶካ ሄርቃ ቤዜሎ
 ዔኤቢኬያ ጌይ ሺሪ ዛጊባኣሴ።
- 2 ናንጊና ናንጋ ጎዳ ዒሰራዔኤሌኮ ናንጎ ቤዞ ቢያ ሚጪንቱዋዎ
 ባይዜኔ፤
 ዒዚ ዳጋዴ ዪሁዳ ዴሮኮ ዋርዲዮ ሻሄኔ፤
 ዒኢካ ዓኣ ካኣቶና ቢታንታ ዓኣ ዓሶና ሳዓ ዔኪ ዠቢ
 ዳውሲሴኔ።
- 3 ዒዛኮ ዴኤፖ ዳጎና ዒሰራዔኤሌኮ ዋልቆ ቢያ ላቢሴኔ፤
 ዋርካ ዒሰራዔኤሌይዳ ሙካኣና ዒዚ ዔያቶ ማኣዶ ሃሺ
 ያይቆኦቤ ዜርፆይዳ ፔኤኮ ዳጎ ታሞ ዔኤሣኔ፤
 ከይላ ዓኣ ባኮ ቢያ ሙዓ ታሚጉዲ ሙዔኔ።
- 4 ዒዚ ዋርኬጉዲ ሂኢዠና ፔኤኮ ኦና ዲካኒ ዓኣሣኔ፤
 ዒዛኮ ሚዛቆ ኩጫ ኦና ማኣሳንሣኒ ጊኢጌኔ፤
 ዩሩሳሌሜይዳ ዓኣ፣ ኦኡኒ ናሽካ ዓሶ ቢያ ዒ ዋዴኔ፤
 ፔኤኮ ዳጎ ታሚጉዲ ዒዚ ዔኤሣኔ።
- 5 ናንጊና ናንጋ ጎዳ ዋርኬጉዲ ማዒ ዒሰራዔኤሌ ባይዜኔ፤
 ካኣቱሞ ማኣሮዋ ዶይሲ ኩርሴኔ።
 ዋርዲዮ ሻሄኔ፤
 ዪሁዳ ዴሮይዳ ዩኤፒና ዒላቲና ዲቢሼኔ።
- 6 ናንጊና ናንጋ ጎዳ ፔኤኮ ጌኤዠ ማኣሮ ጎሺዳ ዓኣ ዉልሻጉዲ
 ሻሄኔ፤
 ጊዮኔይዳ ቦንቾ ቦንቾንታ ሃውሾ ከሎዋ ዓይሴኔ፤
 ፔኤኮ ዴኤፖ ዳጎና ካኣቲንታ ቄኤሶዋ ዳውሲሴኔ።
- 7 ናንጊና ናንጋ ጎዳ ዒዛሞ ዒንጎ ባኮ ዒንጎ ቤዞ ቦሃኔ፤
 ፔኤኮ ጌኤዠ ማኣሮዋ ሃሼኔ።
 ካኣቱሞ ማኣሮኮ ከኤሎ ዲያ ዋርካ ዶይሳንዳጉዲ

ዒዚ ዓኣሢ ሞርኮም ዒንጌኔ፤
ዬያሮ ሞርካ ቦንቾ ከሊና ማዲንታ ጎይሢ
ጌኤዠ ማኣሮይ ዎዛና ኮርጌኔ።

8 ናንጊና ናንጋ ጎዳ ዬሩሳላሜ ካታሞኮ ከኤሎ ዲያ ሻሂኒ ገኢጊ
ሚያ ሱዞ ሊካ ከይሴኔ፤

ካታሜሎ ባይዚፃፓ ገንሢም ጌይባኣሴ፤
ካታሞ ካፖ ዴጌ ከኤሎ ዲፃኣ ዲኡቁ ሻሂንቴኔ፤
ዬይ ቢያ ፔቴና ዶዔኔ።

9 ካታሞ ጌሎ ካሮ ዎዶ ካራ ሳፖ ዳማ ዱኡኪንቴኔ፤

ኮምባልቁ ዎዶ ጋጋርዛኣ ሜቂ ሜቂ ጋፔኔ፤
ካኣቲንታ ዒዚ ቢታንቶ ዒንጌ ሱኡጎንታ
ሜሌ ዳሮ ባኣኮይዳ ዳውሲንቲ ዳንዲ ዓኣኔ፤
ሙሴ ዔርዜ ዎጎ ሃካፓ ሴካ ከኤዚ ዔርዛ ዓሲ ባኣያ
ማዓንዳኔ፤
ፆኣሲ ማሊያ ከኤዛ ዓሶም ሃካፓ ሴካ ናንጊና ናንጋ ጎዳ ፔጋሲ
ዳዎንዳ ባኣዚ ባኣሴ።

10 ዬሩሳላሜ ካታሞይዳ ዓኣ ጋርቻ ሳዓ ዘቲ ጌይ ዳዔኔ፤
ዔያታ ፔኤኮ ቶኦኮይዳ ሲላሊ ዎሂ፥ ሲዬ ፓቲሌያ ማኣዔኔ፤
ዒኢካ ካታሞይዳ ዓኣ ዉዱሮ ናኣታ ካራ ባይዚ ሳኣ ዛጌኔ።

11 ዳሮ ታኣኮ ዎዶ ኩርሶናሢሮ
ናኣታ ካታሞ ሳዞ ጎይፆይዳ ላቢ ሎኣማሢሮ
ዬኤኬ ጎይሢ ዓኣፓ ታኣኮ ዶጩኔ፤
ጎዳኣ ታኣኮ ዎኣፄኔ፥ ሃጊ ማዓ ዎዛኣ ታኣኮ ባኣያ ማዔኔ።

12 ፆልዚ ቦኦሊዳ ዱኡቴ ፖኦሊሴጉዳ
ካታሞ ሳዞ ጎይፆይዳ ላቢ ሎኣሚ ላሂ ላሂ
ዒንዶንሢኮ ቃሶይዳ ጌኤቂንቲ ዳዒ
«ዒንዳ! ሙኡዚ፥ ዎኣሢ ዒንጌ» ጌይ ዬኤኪ ዬኤኪ
ሼምፓሢ ዔያቶኮ ዬያይዳ ዱጲ ጋፓኔ።

13 ታ ዎዚ ጎፆንዶይ? ዓይጎና ታ ዒንሢ ሄካሳኒ ዳንዳዓይ?
ታኣኒ ናሽካ፥ ዬሩሳላሜ ካታሞ ዳራ!
ታ ዒንሢ ደዲሻኒ ዓይጎና ታ ዒንሢ ቤቂሶንዶይ?
ዒንሢ፥ ዬሩሳላሜ ካታሞ ዳራ!
ዒንሢዳ ሄላንዳ ባይሲንታ ዳልጎ ባዞጉዳ ዳኤፒታሢሮ

ገኑኒ ዒንሢሂ ዓውሳኒ ዳንዳዓይ?

14 ዒንሢሂም ሎንሦ ከኤዛ ዓሳ ዒንሢሂም ሉኡቁ፥ ሃሣ ዒንሢሂ ጌጌሼኔ፤

ዔያታ ሉኡዚ፥ ሃሣ ዳዳቢሻ ሎንሦ ዒንሢሂም ከኤዜኔ፤
ዒንሢሂም ጊኢጊ ዓኣ ፑርቶ ባካፓ ዒንሢሂ ማሃኒ
ዒንሢሂኮ ዳቢንቶ ዒንሢሂም ፔጋሲ ከኤዚባኣሴ።

15 « ኮሺ ሚዛጲኬ » ጎጋዛ፥ ዓጮ ዴራ ቢያ
ዒኢካ ሙኪ ምዛዳዛ፥ ሃኖ ካታሚሎዳ?»
ጌይ ጌይ ጎይጾና ዴንዳ ዓሳ ቢያ
ዩሩሳላሚ ዛጋ ዓሳ ቦሂሂና ኩቺ ባዒ ባዒ

ቶኦኮ ፔኤኮ ዓገሂ ዓገሂ ሚኢጫንዳ።።

16 ዒንሢሂኮ ሞርካ ቢያ ዒንሢሂ ጫሽኪ ጫሽኪ ሚኢጫ ዓማላኔ፤

ዒንሢሂ ቶኦቺ፥ ዓጮ ፔኤኮ ዳዓኔ፤
ሂዚ ጌይያኣ ዒላታኔ፡- «ኑ ዔያቶ ኩርሲናኣኮከ!
ሂዮ! ሃይማ ኑ ማሊ ሃይቃ ከሎማዋይ!
ጋፒንሢሂ ዑሰካ ኑ ዓካሪ ዴንቄያኣዋይ።።»

17 ናንጊና ናንጋ ጎዳ ማሌ ባኮ ማዲ ኩንሢኔ፤
ቤርታ ዒዚ ከኤዜ ቃኣሎ ማዶይዳ ፔኤሼኔ፤
ሚርጌ ምዴኮ ቤርታ ዒ ማሊ ቱኬ ጎይጾ ማኣሚቃይዶ ሻሄኔ፤
ሞርካ ዒንሢሂኮ ካሮ ባይዚያና ምዛዳንዳጉዲ ዒ ማሄኔ፤
ዒንሢሂ ሞርኮኮ ምልቆ ዒዚ ዶዲሼኔ።።

18 ዩሩሳላሚ ዴሬዮቴ! ዒንሢሂኮ ዒላታ
ከኤሎ ዲያይዳ ማኣሞንጎ!
ናንጊና ናንጋ ጎዳ ምይዛንዳጉዲ ዒላቱዋቴ!
ዓቢፃ ዒንሢሂኮ ሞንቶንታ ሮኦርንታ ቢያ ዲጲጉዲ ምቶንጎ፤
ፔቴታጾ ሃውሺፖቴ፤ ዓኣፓ ዩኤፖ ሃሻንዳጉዲ ዚቲ ጌይፖቴ።።

19 ዲሞና ምዶ ካፒ ዔቂ ዔቂ ዒላቲ ዒላቱዋቴ፤
ዒንሢሂም ማሊንታ ባኮ ቢያ ናንጊና ናንጋ ጎዳም ከኤዙዋቴ፤
ካታሞ ሳዛ ምላ ካኣማ ጎይጾይዳ ናይዲ ላቢንቲ ሎኦማ ናኣቶ
ሼምፓሂም
ናንጊና ናንጋ ጎዳ ሺኢቁ፥ ኩጮ ዒንሢሂኮ ሌካ ዔቂሱዋቴ።።

- 20 ናንጊና ናንጋ ጎዳሢዮ! ሃዳራ ኑና ዛጌ!
 ሃያኮ ቤርታ ሃያይዲ ኔኔኒ ዙሌ ዳዌ ዳሬ ዓኣኖ?
 ላኣላ ፔኤኮ ሸይ ዲቼ ናኣቶ ሙዔንቴሞ!
 ያኦሲኮ ጌኤዢ ማኣርይዳ ቄኤሶንታ
 ያኦሲ ማሊያ ኬኤዛ ዓሶንታ ዎዲንቴንቴሞ!
- 21 ዴጌሢንታ ጋርቾንታ ዒማ ጎይያ ዎዲንቴ ጎይፃ ኬኤሪንቴኔ፤
 ዴጌ ዓተንቆንታ ዉዲራሢንታ ሞርኮኮ ጨንቾ ዓራፓ ዎዲ
 ኩርሴኔ፤
 ኔኔኒ ዲጋዴ ዓቦና ማኣሚቃይዶ ኔ ዔያቶ ሹኪሲሴኔ።
- 22 ቦንቾ ኬሊና ሙኡዚሮ ዔኤሎጉዲ ሞርኮ ቢያ ቤዛፓ ኔኔኒ
 ዔኤሌኔ፤
 ኔኔኒ ዲጋዴ ዓቦና ፔቴታዎ ሸምፔና ቶሊ ዓቴ ዓሲ ባኣሴ፤
 ታኣኒ ሸይ ዲቼ ናኣቶ ሞርካ ዎዲ ኩርሴኔ።

3

ጎሜ ቡኡዲሢና ዳቆ ዳቂንታ

- 1 ያኦሲኮ ዳጎ ኮኣሎና ጳዲንቴ ሜቶ ዛጌ ዓሲ ታናኬ።
- 2 ዒዚ ፔ ቤርታፓ ታና ፔቴታዎ ፖዒባኣ
 ዲሚ ቤሲ ዳውሲ ዳኬኔ።
- 3 ኬሰኬ ዓባ ጌሊ ካራንዳኣና
 ታና ሌሊ ዒዚ ጳርቄ ጎይሣ ዳዔኔ።
- 4 ዒዚ ታኣኮ ዑያ ዓሸኮንታ ዒልዎንታ ጋርቾሴኔ፤
 ማጌያዎ ታኣኮ ማንሣኔ።
- 5 ዒናፓ ዲጋሳ ዲጋና ላቢሢና ታጊዳ ዳኪ ታና ማንጊሴኔ።
- 6 ሃይቄዎ ሚርጌ ናንጌ ዓሲጉዲ
 ዲሚዳ ታና ዳይሢ ሃሼኔ።
- 7 ኮይሎ ታኣኮ ዒዚ ዲርቄሢሮ ቶላኒ ታ ዳንዳዒባኣሴ፤
 ካኒ ቢራታና ታና ዒ ቱኬኔ።
- 8 ታና ዒ ማኣደም ታኣኒ ዒላቴቴያ
 ታኣሲ ዋይዛኒ ዒዚ ኮዒባኣሴ።
- 9 ጎይያ ታኣኮ ዓርሲንቴ ዳኤፒ ዳኤፒ ሹቹና ዲርቄኔ፤
 ታኣኒ ዳንዳ ካርዋ ሸርሺ ዎቢሴኔ።

- 10 ዒዚ ታና ሙዓኒ ካቲ ዓአ ዲቤ ጌይንታ ቦፖጉዲ፤
ጊንሣ ሃሣ ታና ዎዳኒ ጊኢጊ ዔቁ ዘቢ ማዔኔ።
- 11 ኅይፃፓ ታና ኅቹ ዔከ ሸኢሸ ሸኦሌኔ፤
ታና ማአዳያአ ባአያ ማሂ ሃሺ ዴንዴኔ።።።
- 12 ፔ ሂኢዠና ታና ዱካኒ ዓአሣኔ፤
ሆቲና ታና ዱኪ ዓይዲሳኒ ዒ ጊኢጌኔ።

- 13 ሂኢዠና ሳዘ ታኣኮ ቁርፂዲ ዱኬኔ።
- 14 ታ ዴርኮ ታኣኒ ሚኢቹ ባአዚ ማዔኔ፤
ዔያታ ኮርጋ ኬሎ ዴንዲ ዚር ሄላንዳአና ታና ቦሂ ቦሂ ኮርጋኔ።
- 15 ማቶ ታጊዳ ዲቢሲ ናንጎ ታኣኮ ጫንቁሴኔ፤
ታና ዒዚ ዋላንጋ ላይሲ ሚሽኔ።

- 16 ቃንፆ ታና ዳይሲ ዓጮ ታኣኮ ማንሣኔ፤
ሳፆ ሲላሎይዳአ ታና ሂዒ ኬኤሬኔ።
- 17 ታኣኮ ሸምፓሂ ኮሹሞ ጋዓ ባአዚ ዴንቃኒ ዳንዳዒባአሴ፤
ዎዛ ጎፆ ባአዚ ዓይጎታቲያ ታኣም ጸቁዋሴ።
- 18 ዬያር ታኣኒ፡- «ቦንቻ ታጊዳፓ ዴንዲ ባይቁኔ፤
ናንጊና ናንጋ ጎዳ ታኣም ሃጊ ዒንጋንዳአዋይ ታ ጋዓ ባካ ቢያ
ሙኪ ታና ሄላ ካራ ባአያ ማዒ ዓቲኔ» ጌዔኔ።

- 19 ታኣኮ ማቶና ካር ባይቁፆና ዛሎ ማሊፃ
ዓዳ ዋላንጋና ጨሽናጉዲ ታኣም ጫንቁኔ።
- 20 ዬያ ዛሎ ቢያ ዎዴ ታኣኒ ማላአና
ዒና ታኣኮ ኮሺ ፆያኔ።
- 21 ጋዓንቲ ፔቲ ታኣኒ ማላ ባአዚ ዓአኔ፤
ዬና ታ ማላማና ሃጊ ማዓንዳ ዎዛና ዒና ታኣኮ ሃውሻኔ።

- 22 ዬና ዓይጎዳይ ጌዔቲ፡-
ኩኢ ባይቁዎፆ ሸምፔና ዓቲ ዓአሣ
ናንጊና ናንጋ ጎዳኮ ሚጨንቲፃ ፔቲታፆ ጋፑዎያ
ናሹማአ ናንጊና ናንጋያ ማዔሣርኬ።
- 23 ዬይ ሚጨንቲፃ ኬላ ኬላ ዓካዳኔ፤
ናንጊና ናንጋ ጎዳ ማዔ ኔኤኮ ጉሙርቁንቲፃ ዴኤፒኬ።
- 24 ናንጊና ናንጋ ጎዳ ታኣኮ ጊሸኮና ጊሺ ማዔሣር
ዒዛ ሌሊ ታኣኒ ጉሙርቃንዳኔ።

- 25 ዒዛ ጉሙርቂ ሃጋኦ ዎዛ ዒዛይዳ ጌሣዘንሢና
ዒዛ ኮዓዘንሢናም ዒዚ ኮሺኬ።
- 26 ዓሲ ዚቲ ጋዓፆ ናንጊና ናንጋ ጎዳ ዳቂሻ ዳቂሺያ
ጉሙርቂ ካፔያታቲ ቃራኬ።
- 27 ዓሲ ዳጌ ዓኣፆ ሜቶ ጊቢ
ዳንዳዒ ዔኬቴ ኮሺኬ።

- 28 ናንጊና ናንጋ ጎዳ ዒዛይዳ ሜቶ ዓጋኣና
ዚቲ ጌይ ፔኤር ዒ ዳዔቴ ቃራኬ።
- 29 ሃጊ ጊንሣ ኮሺ ባኣዚ ሙካኒ ዳንዳዒሢር
ሳዓ ባሊቲና ላሂ ናንጊና ናንጋ ጎዳም ዓይሢንቲ ዎርቆንጎ።
- 30 ባዓሢም ጋንጋር ዳቂ ሃሾንጎ፤
ጫሺታቲያ ዔዔኮንጎ።

- 31 ናንጊና ናንጋ ጎዳ ዬያ ቢያ ማዳቲያ
ናኣናና ኬንኬሊዲ ዓሲ ሃሹዎሴ።
- 32 ዎዚ ዓሲዳ ፑርታ ባኣዚ ሄላንዳጉዲ
ዒዛ ማሊሢ ማዓቲያ
ዒዛኮ ዑሣ ዓኣዳ ዲቦ፣ ናንጊና ናንጋ ናሹዎና
ዓሲም ዒዚ ሚሚጨንታኔ።
- 33 ዬይ ያዲ ማዓሢ ዒዚ ፔ ሺኔና
ዓሲዳ ሜቶና ፆዩሢና ሄሊሱዎኣሢርኬ።

- 34 ዓጩሎይዳ ቢያ ቱኡቲ ዓኣ ዓሳ ቢያ
ጌኔ ጎይሢና ሄርቂንታሢ፣
- 35 ዳኤፖ ፆኦዛሢ ዛጋንቲ
ዓሲኮ ቶኦኪ ባይዘሢ፣
- 36 ፔቲ ዓሲኮ ጌኤሲ ዎቦ ጎይሢና ዎጊንታሢ
ጎኔና ናንጊና ናንጋ ጎዳ ሃያ ባኮ ዛጉዎዓዳ?

- 37 ናንጊና ናንጋ ጎዳ ቤርታ ማሊ ቱኪባኣ ባኣዚታቲ
ዒዛ ዓይሢ ፔቲ ባኣዚታዎ ማዲሻኒ ዳንዳዓ ዓሲ ፆናዳይ?
- 38 ፑርታ ባኣዚታቲያ ኮሺ ባኣዚ ማዲንታሢ
ዳኤፖ ፆኦዛሢ ዓይሢምኬ።
- 39 ሄዳፆ ዓካሪ ሸምፔና ዓኣ ዓሲ ፔ ጎሞና ሜቶ ዔካፆ
ጉንዱማሢ ዓይጎርዳፆ?

- 40 ኑ ሃንታ ሃንቲያ ማሂ ኑ ዛጎም፤

- ናንገና ናንጋ ጎዳ ባንሢ ኑ ማፆሞ።
 41 ኑኡኮ ዒኖ ኑ ኩጮና ዎላ ጫሪንጫ ዓኣ ኑ ፆኦዛሢ ባንሢ ኑ ዔቂሲ፥ ሂዚ ኑ ጎፆሞ፡-
 42 «ኑ ፆኦዛሢ! ኑኡኒ ኔኤሞ ዎይዘ ዒዒ ጎሜ ማዕኔ፤ ኔኤኒ ኑና ማኣሪባኣሴ።»
- 43 «ዳጋዲ ፑኡካኒ ዑኪ ኑና ኔ ዳውሴኔ፤ ማኣሚቃይዶ ኑና ኔ ዎደኔ።
 44 ኑ ሺኢጲፆ ሙኪ ኔና ሄሉዋጉዲ ዲሞ ንዔ ሻኣሬና ኔና ኔኤኒ ዓኣቼኔ።
 45 ዴር ባኣኮይዳ ቡኡራጉዲ ኔ ኑና ላኣሊ ሃሺኔ።»
- 46 «ኑኡኮ ሞርካ ቢያሢ ኑና ጫሽኪ ጫሽኪ ሚኢጪ ኑና ዓማሌኔ።
 47 ዒጊቹሞና ባይሲንታና ሜቶንታ ሂርጋንታ ሙኪ ኑና ሄሌኔ።
 48 ታኣኮ ዴርይዳ ሄሌ ባይሲንቶ ዛሎ ዓቢሢ ታኣኮ ዓኣፓፓ ዎርዚ ዎኣሢጉዲ ጎዓኔ።»
- 49 «ዓኣፓ ታኣኮ ሃውሾ ባኣያ ዩኤካኔ።
 50 ዩይ ያዲ ማዒ ዴዓንዳሢ ናንገና ናንጋ ጎዳ ጫሪንጫፓ ሊካ ዛጊ ዴንቃንዳያ ሄላንዳኣናኬ።
 51 ታኣኮ ካታሞይዳ ዓኣ ዉዲር ናኣቶ ቢያሢዳ ሄሌ ባኮ ዛሎና ታኣኒ ካራ ባይቂ ታ ዒኖና ማሊ ሜታደኔ።»
- 52 «ጉሪ ታና ዒፆ ሞርካ ካፒሞ ፒር ፒርጉዲ ታኣሞ ፒሬኔ።
 53 ታኣኒ ሃይቂባኣንቴ ዔቴይዳ ታና ዓጊ ዔቶ ካር ሹቻ ዔያታ ዎደኔ።
 54 ዎኣሢ ታኣኮ ዑሢና ኩሚ ዴንዳኣና ታኣኒ ሃይቃንዳ ዎዳ ዑኬያ ታኣሞ ማሌኔ።»
- 55 «ናንገና ናንጋ ጎዳሢዮ! ዴኤፖ ዔቶይዳ ታኣኒ ጌሊ ዓኣፆ ኔና ሺኢቄኔ።
 56 ታኣኒ፡- <ዎዮ ኔኤኮ ታ ባንሢ ማሄ፤ ዑኬና ሙኪ ታና ማኣዴ> ጌይ ሺኢቃሢ ኔኤኒ ዎይዜኔ።»
 57 ታኣኒ ኔና ዔኤሌ ዎዶና

ኔኤኒ፡- «ዒጊጨገ!» ጌይ ታና ዶዲሺኔ።

58 «ናንጊና ናንጋ ጎዳሢዮ! ኔኤኒ ታ ዛሎ ሞኦቲ
ታና ኔኤኒ ዓውሴኔ።

59 ናንጊና ናንጋ ጎዳሢዮ!
ታኣሞ ማደና ጌኖ ቢያ ኔኤኒ ዛጌሢር
ታኣሞ ጌሰቲ ዎጌ።

60 ታኣኮ ሞርካ ታና ኮማኒ
ዎላ ጌሰቲ ቱኩ ቱኡዞ ኔኤኒ ዴንቄኔ።»

61 «ናንጊና ናንጋ ጎዳሢዮ!
ታና ዔያታ ጫሽኬ ጫዠና
ታኣሞ ዔያታ ማሌ ጌኖ ኔ ዎይዜኔ።

62 ኬሰኬ ዓቢ ዴንዲ ጌሊ ካራንዲያ ሄላንዳኣና
ሞርካ ታና ባይዞንዶ ጎይዖ
ዎላ ካሽካሺ ጌሰታኔ።

63 ዔያታ ዴዒያ ማፖሞ ዔቂ ቶሳ ቶሶና
ታና ጫርጋ ጫጮ ዔያቶኮ ዛጌ።»

64 «ናንጊና ናንጋ ጎዳሢዮ! ዔያታ ማዴ ባኮ ዛሎ
ኮይሳማጉዴያ ማሂ ዔያቶሞ ዒንጌ።

65 ዔያቶ ጋዳንቂ
ካራ ዔያቶኮ ባይዜ!

66 ናንጊና ናንጋ ጎዳሢዮ! ኔ ዳጎና ዔያቶ ደውሴ፤
ጫሪንጮ ዴማፓ ጋፒሲ ዔያቶ ኩርሴ!»

4

ዬሩሳላሜይዳ ሄሌ ሜቶ

1 ጌኤዠ ማኣር ማዠና ሹጫ ጉሪ ዞኦሰካ ኬኤሪንቴኔ።
ዎዎይቲዎ ዎርቃ ሳልፔንቴሞ!
ጌኤዠ ዎርቃ ሜሌ ባኣዚ ማዔንቴሞ!

2 ዲዮኔይዳ ዓኣ ዓቲንቆ ናኣታ ጌኤሺ ዎርቁጉዲታፖኬ፤
ሃይሾ ሃሢ ማኒ ዠኢጪጭ ዓጨና ማዠ
ሜሂ ማዒ ዓቲንቴሞ!

3 ዉኡካሢታፖ ፔኤኮ ሾፖና ናኣቶ ዳዳንሢሢ፤
ሃይ ታኣኮ ዴራ ዓሲ ናንጉዎ ደውሎይዳ ዓኣ ቱኡቴጉዲ

ፔኤኮ ናኣቶም ሚጨንቴዎያ ማዕንቴሞ!

4 ናኣቶ ዔያቶኮ ዋኣፃ ዳኤቤሢረ ናኣቶኮ ዒንዲርዘ
ዳንጎይዳ ዓዲንጎቲ ዳዔኔ፤
ናኣታ ዔያቶኮ ሙኡዚ ሺኢቃኔ፤

ጋዓንቴ ፔቴታፖ ዔኤቢ ዔያቶም ዒንጋ ዓሲ ባኣሴ።

5 ሃያኮ ቤርታ ቃውቲ ቃውቲ ኮሺ ባኣዚ ሙዓ ዓሳ
ካራ ባይዚ ሴካ ሃንጋ ጉሪ ዠፍኤማኔ።
ጋላፒ ማዔ ሚዛጰ ማኣዓሢ ማይንጎቲ ዲጨዮ ዓሳ
ሃሢ ዲቢንሢሢ ላኣሎ ዲባይዳ ፔና ሃሺ ላሃኔ።

6 ታ ዳርይዳ ሄሌ ሜታ
ፆኦኒያ ካኣሙዋንቴ ዶዒ ባይቄ
ሶዶሜ ካታሞ ሜታፓ ባሻያኬ።

7 ካኣቶ ናኣቶ ማዔ ዔያቶ ሱኡጋ ዔያቶ ኮይላ
ሻቺፓ ባሺ፤ ዲኢቂፓኣ ባሺ ጌኤሽኪ ደዳያኬ፤
ዔያቶኮ ሚዛጰማ ሴንፔሬ ጌይንታ ሹጮጉዲኬ።

8 ሃሢ ጋዓንቴ ዓኣፖ ካራ ዔያቶኮ ጨላንቺጉዲ ካርቴኔ፤
ዘኣዛ ዔያታ ሜታዲ ሃንታኣና ዔያቶ ዔራ ዓሲያኣ ባኣሴ፤
ሜልዚ ሚሢጉዲ ዒልዓ ዔያቶኮ ዑፆይዳ ፓዒ ባይቄኔ።

9 ናዮና ሃይቄ ኩዳ ዓሶይዳፓ
ጨንቾ ዓራፖና ዋዶ ዓሳ ቃራኬ፤
ሙዓ ባይቄሢረ ዓሳ ዘኣዛ ናዮና ሜሊ ጉሪ ኩዳኔ።

10 ባይሲንታ ኬዳሞ ካታማ ካራ ባይቄ ዋዶና
ናኣቶ ሚጨንታ ላኣላ ፔ ኩቻ ፔኤኮ ናኣቶ ካሢ ሙዔኔ።

11 ናንጊና ናንጋ ጎዳ ፔኤኮ ዳኤፖ ዳጎ ዳንሢ
ዒዮኔኮ ፃጰ ሙይ ዶዶይጎንዳ ታሚጉዲ
ዔዔኤታ ፑርታ ባኣዚ ኬይሴኔ።

12 ዓጮ ቢያሢዳ ዓኣ ካኣቶዋ ማፆሞ ዳራ
ዬሩጎላሚ ካታሞኮ ጌሎ ካርና
ሞርኬ ጌላንዳኔ ጌይ ፔቴታፖ ማሊባኣሴ።

13 ጋዓንቴ ዩይ ያዲ ማዔሢ ዒኢካ ጌኤዠ ዓሶ ዎጳ
ቄኤሶንታ ያኦሲ ማሊያ ከኤዛ ዓሶ ጎሞ ዛሎናኩ።

14 ዔያታ ዩይ ሱጉያና ዒኢቴያታሢር
ዔያቶኮ ማእዓሢታያ ጨርቄ ካአማ ዓሲ ባአሴ፤
ዔያታ ዓአፒ ባይቄ ዓሲጉዲ ጎይያይዳ ሴካ ሃንጋ ቴኤም ጋዔ።

15 ዩይሮ ዳራ፡- «ዳንዲ ባይቄዎቴ!
ዒንሢ ዒኢቴ ዓሲታሢር ኦና ሄሊፖቴ!» ጌይ ዒላታ።

ዩይሮ ዔያታ ዒፃ ዳውሶና ዓሲ፥ ሃሃ ቤሲ ባይዜ ዓሲ ማዔ፤
ዳራ፡- «ሃካፓ ሴካ ማይ ዔያታ ኦ ባአካ ዳይንዲዎሴ» ጌዔ።

16 ናንጊና ናንጋ ጎዳ ዔያቶ ፔኤር ዜሪ ዳኬሢር
ሃካፓ ሴካ ዒዚ ዔያቶ ዛሎ ማላዓኩ፤
ቄኤሶዎ ዒዚ ቦንቸሳዓኩ፤
ዒኢካ ዓአ ጋርቾማአ ኮሺ ባአዚ ማዲንታዓኩ።

17 «ኦና ማእዳንዳያ ሙካንዳኔ» ጌይ ኦ ጎይሢ ዛጋአና ላቤ፤
ኦና ዓውሳኒ ዳንዳዑዎ ዓሲ ኦኡኮ ሴኤሎይዳ ዔቄ ኦ ጉሪ
ካፔ።

18 ኦኡኒ ጎይያይዳና ሴካ ሃንጋ ሃንቴዎጉዲ
ሞርካ ኦና ዚርቄ ዔቄ ካፓ፤
ኦኡኮ ጋፒ ዎዴ ሄሌ፤ ሴሊ ኦም ማንሦናአኩ፤
ኦኡኒ ኩዳኒ ዑኩ።

19 ኦና ዳውሳ ሞርካ ኮኦኬይዳፓ ባሼ ሩኡራያኩ፤
ዲኮ ዑያይዳ ኦና ዳውሴ፤
ዓሲ ናንጉዎ ዳውሎ ቦኦሎይዳአ ኦና ካቴ።

20 ናንጊና ናንጋ ጎዳ ካአቲ ማሢ ዶኦማ
ኦኡኮ ሸምፓሢኮ ዑኡዞ ማዔሢ
ዔያታ ፔ ፒራሢና ፒሪ ዓይሣ፤
ዒዛ ሺቦ ዳማ ዳዒ
ዳር ባአኮይዳ ናንጋንዳኔ ጌይ ኦኡኒ ማሌንቴኩ።

21 ዒንሢ ዑፃይዳ ናንጋ፥ ዔዶኦማ ዳራ

ዎዛዲዎቹ፥ ዒላሹዎቹ!
 ጋዓንቴ ዒንሢሞ ጊኢጊሸና ጳዳሢ
 ፔ ዎዶ ካፒ ሙኮ ዓታዓኬ፤
 ዒንሢያ ማሢንቴ፥ ማኣዓሢ ኬኤሪ ካላዳንዳ።

22 ዬሩሳሌሜ ዴሪዮቹ! ዒንሢ ዳቢንቶሮ
 ዒንሢሞ ዓጎና ፑርቶ ባካ ጊዳንዳ፤
 ናንጊና ናንጋ ጎዳ ዑኬና ዒንሢ ዳውሲንቴ ዴንዴ ባዛፓ
 ማሃንዳ፤
 ጋዓንቴ ዔርሚያሴ ዴሪዮቹ! ዒንሢ ዳቢንቶ ዛሎ
 ናንጊና ናንጋ ጎዳ ዒንሢዳ ማቶ ዓጋንዳ፤ ዳቢንቶዎ ዒንሢኮ
 ፔጋሳንዳ።

5

ፆኦሲ ሚጨንታንዳጉዲ ሸኢቁንቴ ሸኢዲሢ
 1 ናንጊና ናንጋ ጎዳሢዮ! ኑና ሄሌ ባኮ ዛሎሮ ኑም ማሌ፤
 ኑኩኮ ዳውሲንቶ ዛጌ!

2 ኑኩኮ ዴና ዔውቲ ማሌ ዓሲም ዒንጊንቴ፤
 ኑኩኮ ኬኤፃ ቢያ ማሌ ፃንጎ ዓሲ ናንጋ ኬኤሢ ማዔ።

3 ኑኩኒ ዓዴ ሃይቄ ዜኤሪ ማዔም
 ኑኩኮ ዒንደንሢያ ዜኤሪ ዒንዶ ማዔ።

4 ኑኩኒ ዑሸካ ዎኣፆንታ
 ካያፓ ሃኣኮ ሃንፂሎንታ ሻሻንቃ።

5 ኑና ዳውሳ ዓሳ ኑኩኮ ባቃና ዴዒ ዓኣ፤
 ኑኩኒ ላቤ፥ ሃውሸዎ ኑኩኮ ባኣሴ።

6 ኑም ጊዳ ሙኩዚ ዴንቃኒ ጊብፄ ዓጮና
 ዓሶኦሪ ዓጮናም ኩቺ ኑ ዒንጌ።

7 ኑ ዓደንሢ ጎሜ ማዲ ኑም ሃሽ፤
 ኑኩኒ ዔያቶም ዓጎና ማቶ ዔኪሢዳኬ።

8 ሃያኮ ቤርታ ዓይሌ ማዔ ዓሳ ሃሢ ኑና ዎይሣያ ማዔ፤
 ዔያቶ ኩጫፓ ኑና ዓውሳኒ ዳንዳዓ ዓሲያኣ ባኣሴ።

- 9 ደውሎ ቦኦሎይዳ ዋዳ ዓሲ ዓአሢሮ
 ኑኡኒ ሙዖ ባአዚ ዳንቃኒ ዳንዳዓሢ
 «ዋዳቴ ዋዳ፣ ዳቂሼቴ ዳቂሼ» ጌይኩ።
- 10 ናያ ኑና ባሼሢሮ
 ዑፃ ኑኡኮ ናአቦጉዲ ጨላንቄኔ።
- 11 ኑኡኮ ለአላ ሂዮኔይዳ
 ኑኡኮ ዉዲሮ ናአታአ ዪሁዳ ካታሞይዳ
 ዋልቄና ዓርቂንቴኔ።
- 12 ኑ ሱኡጎኮ ኩጮ ቱኪ ሱዲ ዋዳናኔ፤
 ኑኡኮ ጋርቾዋ ቦንቺቦኦሴ።
- 13 ዓቲንቆ ዳጌሢ ዋልቃዲ ዋንሢ ዋዲሾናኔ፤
 ዓቲንቆ ናአቶ ዳካአ ዴኤሢ ሃንዲሌ ኩዲና ሜታዳኔ።
- 14 ዓጮ ጋርቻ ዳይ ዋጎ ዋጋ ቤዞ ሃሺ ዳንዳኔ፤
 ዳጌሢያ ኮርጋ ኮፆ ሃሼኔ።
- 15 ዋዛ ኑኡኮ ዒናፓ ባይቄኔ፤
 ኑ ዋንዴ ዋዛዲ ኮርጋ ኮፆ ባይዚ ያዪሢ ዓርቄኔ።
- 16 ቦንቻ ኑኡኮ ዔውቲ ባይቄኔ፤
 ኑኡኒ ጎሜ ማዳሢሮ ኑና ባዴዔ!
- 17 ያዲ ማዔሢሮ ኑኡኒ ሃርጌ ዓሲ ማዔኔ፤
 ዓአፓአ ኑኡኮ ፒዜ ዛጎ ባሺንቲ ላቤኔ።
- 18 ሂዮኔ ዳካ ዓሲባአያ ጉሪ ቤሲ ማዒ ዓቲሢሮ
 ዉኡካ ዒኢካ ዓማሊ ሺራ ቤሲ ማዔኔ።
- 19 ኔኤኒ ጋዓንቴ ናንጊና ናንጋ ጎዳሢዮ! ናአናና ካአቲኩ፤
 ኔኤኮ ካአቲሞ ያይታ ሙካ ዋዶ ቢያይዳ ባይቃዓኩ።
- 20 ኔ ኑና ዋይታዛ ጋፒ ዋሊ ሃሼዮ?
 ሚርጌ ዋዴ ኔ ኑና ኩንኩሊዲ ሃሼንቴሞ?

21 ናንጊና ናንጋ ጎዳሢዮ! ኔ ባንሢ ኑና ማሄ፥ ኑኡኒ ማዓንዳኔ፤
ኑኡኒ ናንጋ ናንጎ ቤርታኣ ዋድጉዲ ማሄ ጊንሣ ኮሼ።

22 ኔኡኒ ዬያይዲባኣቴ ጋፒ ኑና ኔ ሃሺ
ኑኡኒ ማዳ ባኮሮዋ ዑሣ ዓኣዳ ኔ ዳጋዳኔ ጌይሢኩ።

ጌሌዥ ማግኒት
The Holy Bible in the Maale language of Ethiopia,
using Ethiopic script

copyright © 2008 The Word for the World International and The Bible Society of Ethiopia

Language: Maale (Male)

Translation by: The Word for the World

Contributor: Bible Society of Ethiopia

ጌሌዥ ማግኒት

Maale Full Bible

The Word For The World International

Bible Society of Ethiopia

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-04-13

PDF generated using Haiola and XeLaTeX on 21 Feb 2024 from source files dated 14 Apr 2023

bbcfb90a-3ae3-5452-983d-6c4c02375929